

Galesia

Pas Pol i raitim bilong ol sios long
Provins Galesia.

Tok Pisin ©2015 J Glenn Calderwood
www.pngbiblesources.org

Galesia

Pas Pol i raitim bilong ol sios long Provins Galesia.

1 ¹ Mi Pol, mi wanpela aposel. Wanpela man i no makim mi bilong mekim wok aposel, na wanpela man i no givim wok aposel long mi. Nogat. Jisas Kraiss wantaim God, Papa, i kirapim Jisas long matmat, i mekim mi kamap aposel. ² Mi wantaim ol brata i stap wantaim mi i salim dispela pas.

Mipela salim dispela pas long yupela ol sios i stap long Galesia.

³ Mipela laik grasia na pis bilong God, Papa bilong yumi, na BIKPELA Jisas Kraiss, i stap wantaim yupela. ⁴ Long laik bilong God na Papa bilong yumi, Kraiss i givim Em yet bilong kisim pe bilong sin bilong yumi. Em i mekim olsem bilong sevim yumi long ol pasin nogut nau i stap long graun. ⁵ Bilong Em biknem i stap oltaim oltaim. Tru tumas.

Wanpela gutnius tasol i stap.

⁶ Bel bilong mi i kirap nogut tru, long wanem, kwiktaim tumas yupela i lusim God, Em dispela God i bin singautim yupela long kam pas long grasia bilong Kraiss, na yupela i bihainim narapela gutnius. ⁷ Tok yupela i bihainim i no gutnius. I luk olsem ol sampela manmeri i konfiusim yupela na ol i senisim nabaut gutnius bilong Kraiss. ⁸ Tasol, sapos wanpela bilong mipela, o wanpela ensel bilong heven, i autim gutnius na dispela

gutnius i no olsem gutnius mipela i autim pinis long yupela, orait em i ken i lus long hel. ⁹ Bipo mipela i bin tokim yupela, na mi tok gen, sapos wanpela man i autim gutnius na dispela gutnius i no olsem gutnius yupela i kisim pinis, orait em i ken i lus long hel.

¹⁰ Na mi mekim dispela toktok bai ol manmeri i ken i bel gut long mi, a? O mi mekim dispela toktok bai ol i ken i amamasim mi, a? Sapos mi mekim olsem, orait mi no wokman bilong Kraiss.

God i makim Pol.

¹¹ Mi laik yupela ol brata i mas save olsem, gutnius mi bin autim long yupela i no samting wanpela man i bin kamapim.

¹² Mi no kisim dispela gutnius long wanpela man, na wanpela man i no bin skulim mi long em. Nogat. Gutnius mi autim Jisas Kraiss yet i bin soim mi.

¹³ Yupela i harim stori pinis long bipo pasin bilong mi taim mi pas yet long bilip bilong ol Juda. Long dispela taim mi strong olgeta long mekim nogut long sios bilong God na mi wok long distroim sios. ¹⁴ Na mi bin gohet olgeta long olgeta samting bilong bilip bilong ol Juda, na mi strong moa yet long holim na bihainim olgeta tisim ol bipo papa bilong Juda i bin holim na bihainim. Em olsem na mi winim ol planti poroman bilong mi long ol dispela samting. ¹⁵⁻¹⁶ Tasol, God i bin makim mi pinis taim mama i bin karim mi, na Em i bin mekim grasias long mi na singautim mi. Na taim God Em i amamas long soim Pikinini bilong Em long mi, bai mi autim tok bilong Em long ol Jentail manmeri, long dispela taim mi no bin toktok wantaim ol sampela manmeri. ¹⁷ Na mi no go long Jerusalem na toktok wantaim ol aposel i bin kamap aposel paslain long mi. Nogat. Mi go hariap tasol long Arabia na bihain long dispela mi go bek gen long Damaskus.

¹⁸ Bihain long 3-pela yia mi bin i go long Jerusalem bilong toktok wantaim Pita, na mi stap wantaim em long 15-pela de tasol. ¹⁹ Mi no lukim ol narapela aposel, Jems tasol, brata bilong BIKPELA, mi bin lukim. ²⁰ Tru, long ai bilong God, mi no giamanim yupela. ²¹ Na bihain gen mi bin i go long provins bilong Siria na Silisia. ²² Olsem na, ol sios bilong Kraiss long provins bilong Judia ol i no save tru long mi. Nogat. ²³ Ol i harim stori tasol long mi. Ol i harim stori olsem: "Manya i bin wok long bagarapim mipela nau em i wok long autim dispela trupela bilip pastaim em i laik distroim." ²⁴ Na long dispela samting i bin kamap long mi ol i bin litimapim nem bilong God.

Ol narapela aposel i pas wantaim Pol.

2 ¹ Na bihain long 14-pela yia mi bin i go bek gen long Jerusalem, na mi kisim Barnabas i go wantaim mi. Mi bin kisim Taitus tu na em i go wantaim mipela. ² God i bin soim mi olsem mi mas i go na long dispela as mi go. Em olsem na taim mi kamap long Jerusalem mi bin tokaut klia long gutnius mi save autim long ol Jentail manmeri. Long wanem, nogut ol i tingim wok mi bin mekim i no trupela wok. (Mi mekim dispela toktok long ai bilong ol lidaman tasol.) ³ Na Taitus i stap wantaim mi, na yupela save Taitus em i man Grik, tasol ol i no fosim em long katim skin bilong em. ⁴ Dispela toktok i bin kamap bikos long ples sampela giaman brata i bin hait i stap namel long mipela. Mipela i stap fri long lo bikos Kraiss Jisas i bin mekim wok bilong mipela. Ol dispela giaman brata i kam spai long mipela bikos ol i laik banisim mipela gen long lo. ⁵ Tasol mipela no orait liklik long tok bilong ol, bai trupela tok bilong gutnius i ken i stap na yupela i ken i kisim.

⁶ Na i luk olsem ol sampela lidaman i stap ol i gat namba. Namba bilong ol i olsem wanem mi no save tasol dispela i no

bikpela samting long mi. Long wanem, God i no save skelim man long antap skin samting. Na ol dispela lidaman i gat namba ol i no skruim wanpela tok moa long toktok mi bin mekim. ⁷ Nogat. Ol i luksave olsem God i bin givim wok long mi bilong autim gutnius long ol Jentail manmeri wankain olsem God i bin givim wok long Pita bilong autim gutnius long ol Juda. ⁸ Long wanem, God i wok insait long wok aposel Pita i bin mekim namel long ol lain Juda, na ol i luksave olsem, God i wok insait long wok aposel mi bin mekim namel long ol Jentail manmeri. ⁹ Long ai bilong ol manmeri Jems na Pita na Jon i olsem strongpela pos bilong sios, na taim ol i luksave olsem God i bin givim grasia long mi, orait ol i sekan long mi na Barnabas bilong soim olsem ol i wanbel olgeta long bilip bilong mitupela. Na mipela olgeta i pasim tok olsem, mitupela mas i go na mekim wok namel long ol Jentail manmeri na ol i mas i go na mekim wok namel long ol lain Juda. ¹⁰ Ol i givim wanpela tok tasol long mipela. Ol i tok mipela mas holim tingting long ol manmeri i stap rabis, em dispela samting mi laik tru long mekim.

Pol i stretim Pita.

¹¹ Taim Pita i bin i kam long Antiok mi bin stretim em long fes bilong em yet. Long wanem, i klia olsem em i gat rong.

¹² Pastaim em i save kaikai wantaim ol Jentail manmeri. Tasol, taim ol sampela man i bin kamap, em ol man Jems i bin salim ol i kam, orait em i lusim ol Jentail manmeri na em i stap separet long ol. Long wanem, em i pret long ol lain i pas long pasin bilong katim skin. ¹³ Ol narapela Juda manmeri tu i bin mekim wankain pasin giaman Pita i bin mekim. Na long dispela pasin giaman bilong ol Barnabas tu i bin pundaun.

¹⁴ Taim mi lukim pasin bilong ol i no pas tru long trupela toktok bilong gutnius, mi bin tokim Pita long ai bilong olgeta

olsem, "Yu man Juda, tasol yu no bihainim ol pasin bilong ol Juda, nogat, yu save bihainim pasin bilong ol Jentail. Em olsem na long wanem as yu fosim ol Jentail long mekim pasin bilong ol Juda?"

Long wok Krai i mekim God i kolim yumi "stretpela man".

¹⁵ Yumi i bon insait long lain Juda, yumi no olsem ol Jentail sin manmeri, ¹⁶ tasol yumi save olsem, God i no kolim wanpela man *stretpela man* long pasin bilong bihainim lo. Nogat. God i ken i kolim man *stretpela man* long feitful wok bilong Jisas Krai tasol. Em olsem na yumi bilipim na trastim Jisas Krai, bai God i ken i kolim yumi *stretpela man* long feitful wok Krai i bin mekim; i no long wok yumi i mekim long bihainim lo. Long wanem, wanpela man i no inap tru long kamap *stretpela man* long ai bilong God long wok bilong ol long bihainim lo.

¹⁷ Tasol, sapos mipela i laik God i kolim mipela *stretpela man* long wok Krai i bin mekim, na i luk olsem mipela tu i stap olsem sin manmeri, orait dispela i minim olsem wei bilong Krai i sapotim sin, a? Nogat tru! ¹⁸ Sapos mi kirapim gen samting mi bin lusim, orait dispela i soim olsem mi sakim lo. ¹⁹ Long wanem, tok bilong lo yet i bin kilim mi i dai, bai mi ken i stap laip aninit long God. ²⁰ Taim Krai i dai i olsem mi bin i dai wantaim Em. Olpela laip bilong mi i pinis na nau mi stap long nupela laip bilong Krai. Nau olgeta samting mi mekim long laip bilong mi, mi save mekim bikos Pikinini Man bilong God i bin feitful long mekim wok. Em i bin lavim mi na Em i givim Em yet bilong helpim mi. ²¹ Mi no save mekim grasia bilong God i kamap samting nating. Long wanem, sapos lo em inap mekim yumi kamap *stretpela man* long ai bilong God, orait Krai Em i dai nating tasol.

Bilip o pasin bilong bihainim lo em i wei bilong God?

3 ¹ Yupela ol Galesia, yupela longlong ya! Husat i bin paulim yupela? Long ai bilong yupela yet mipela i bin tokaut klia long as bilong dai bilong Jisas Kraiss long diwai kros. ² Mi laik yupela tokim mi long wanpela samting: Yupela i kisim Holi Spirit taim yupela i bihainim lo o yupela kisim Holi Spirit taim yupela i harim na bilipim na trastim tok mipela i tokim yupela, a?

³ Yupela no gat het, a? Pastaim yupela i kisim nupela laip long strong bilong Holi Spirit, tasol nau yupela laik i stap long nupela laip long strong bilong yupela yet, a? ⁴ Na ol samting yupela i bin lukim, yupela i lukim nating tasol, a? Yupela i lukim nating o nogat, ating i gat kwesten mak yet i stap long yupela. ⁵ God i bin givim Holi Spirit long yupela na mekim ol mirakel namel long yupela bikos yupela i bihainim lo o bikos yupela i harim na bilipim na trastim tok mipela i bin tokim yupela, a?

⁶ Tingting long Abraham: "*Abraham i bilipim God na God i givim nating na givim stretpela pasin long Abraham.*" (Jenesis 15:6)

⁷ Olsem na, yupela mas klia long dispela, ol manmeri i bilip ol i pikinini bilong Abraham. ⁸ Buk bilong God i bin mekim klia olsem, ol Jentail manmeri i bilip God bai givim stretpela pasin long ol na kolim ol *stretpela manmeri*. God i bin tokaut long dispela gutnius taim Em i mekim tok long Abraham olsem, "*Long rot bilong yu, bai Mi blesim ol kainkain lain manmeri i stap long dispela graun.*" (Jenesis 12:3) ⁹ Olsem na, ol manmeri i bilip ol i kisim blesim bilong God wantaim Abraham, dispela man bilong bilip.

Manmeri i stretpela long rot bilong bilipim God bai i stap laip.

¹⁰ Ol manmeri i tingim pasin bilong bihainim lo i ken i mekim ol i stap stretpela man long ai bilong God ol i stap aninit long bel hat bilong God. Long wanem, Buk bilong God i mekim tok olsem, "*Manmeri i no mekim na bihainim olgeta lo bilong Buk*

Bilong Lo olgeta taim ol i stap aninit long bel hat bilong God." (Lo 27:26) ¹¹ Dispela samting i klia olgeta, God i no inap tru long kolim wanpela man *strepela man* long pasin bilong bihainim lo. Long wanem, dispela tok i stap, "*Manmeri i strepela long rot bilong bilipim God bai i stap laip.*" (Habakuk 2:4) ¹² Na pasin bilong bihainim lo em i no samting bilong bilip. Long wanem, dispela tok i stap, "*Man i bihainim ol dispela samting bai i stap laip long dispela samting.*" (Wok Pris 18:5) ¹³ Lo i tok, "Manmeri i no mekim na bihainim olgeta lo olgeta taim ol i stap aninit long bel hat bilong God." Tasol Krai i baim bek yumi; Krai yet i kisim bel hat bilong God, bai dispela strongpela toktok bilong lo i no inap holim yumi moa. Buk bilong God i tok olsem, "*Man i hangamap long diwai em i kisim bel hat bilong God.*" (Lo 21:23) ¹⁴ Krai i baim bek yumi, bai ol lain Jentail, long wok bilong Jisas Krai, ol i ken i kisim blesim olsem Abraham i bin kisim, na mipela i ken i kisim Holi Spirit God i bin promisim long rot bilong bilip.

Lo i no winim Promis bilong God.

¹⁵ Ol brata, mi laik givim wanpela eksempele long yupela: Long ol kontrak bilong dispela graun, taim ol i sainim pinis, orait i no gat wanpela man i ken i rausim kontrak o skruim wanpela toktok moa long dispela kontrak. Nogat tru. ¹⁶ Orait, God i bin givim ol promis long Abraham na long pikinini bilong em. Na Buk bilong God i no tok olsem "long ol pikinini" na i minim ol planti pikinini. Nogat. Buk bilong God i tok olsem "long pikinini" na i minim wanpela pikinini tasol. Na dispela pikinini em i Krai. ¹⁷ As bilong dispela tok na eksempele bilong mi i olsem: Pastaim God i givim promis na dispela promis i olsem kontrak God i sainim pinis. Lo i bin kamap 430 yia bihain long kontrak, na long dispela as lo i no inap rausim kontrak o rausim promis. ¹⁸ Olsem na, sapos ol gutpela kaikai bilong promis i save kamap long rot bilong

bihainim lo, orait em i no i stap moa samting bilong promis. Tasol God Em i mekim grasia na Em i givim ol gutpela kaikai bilong promis long Abraham long rot bilong promis.

¹⁹ Orait, tasol, bilong wanem God i kamapim lo? God i kamapim lo bilong soim ol manmeri sin bilong ol i bikpela tumas. Na God i larim lo i stap tasol i go inap long taim Pikinini bilong promis i kam. Dispela lo bilong God i bin i kam long rot bilong ol ensel na long han bilong wanpela namel man. ²⁰ Na taim yumi harim tok "namel man" yumi ken i tingim tupela sait i stap. Tasol, God yet Em i wanpela.

²¹ Orait, lo em i birua bilong promis bilong God, a? Nogat tru! Sapos God i bin givim wanpela lo na dispela lo inap tru long mekim yumi kamap stretpela manmeri long ai bilong God, orait lo em inap long givim laip long yumi. ²² Tasol, Buk bilong God i tokaut klia olsem, olgeta manmeri bilong dispela graun ol i stap kalabusman bilong sin, bai ol gutpela samting bilong promis i ken i kamap long feitul wok bilong Jisas Krai na ol manmeri i bilip ol i ken i kisim.

²³ Bipo, taim dispela kain bilip i no kamap yet, lo i bin kalabusim yumi. Lo i lokim yumi i stap tasol i go inap long taim bilip i kamap ples klia. ²⁴ Olsem na, lo em i stap olsem waspapa bilong yumi i go inap long Krai i kam, bai God i ken i kolim yumi *stretpela man* long rot bilong bilip. ²⁵ Nau bilip i kamap pinis yumi no i stap moa aninit long dispela waspapa.

²⁶ Nau, long rot bilong bilipim na trastim Krai Jisas, yupela i stap pikinini bilong God. ²⁷ Long wanem, yupela i bin kisim baptais na i pas long Krai yupela i bin karamapim yupela yet long Krai. ²⁸ Nau i no gat ol manmeri Juda na ol Grik i stap, na i no gat ol wokboi nating na ol fri manmeri i stap, na i no gat ol man na ol meri i stap. Long wanem, yupela olgeta i stap wanpela tasol wantaim Krai. ²⁹ Sapos yupela bilong Krai, orait

yupela pikinini bilong Abraham, na yupela bai i kisim ol gutpela samting wantaim Abraham olsem God i bin promisim.

Ol pikinini bilong God.

4 ¹ Tok mi mekim em i olsem: Olgeta samting bilong papa em bilong pikinini man bilong em, tasol taim pikinini i stap liklik yet em i no kisim ol samting bilong papa na em i stap olsem em i wanpela wokboi nating. ² Em mas i stap aninit long ol waspapa na aninit long ol man bilong lukautim olgeta samting i go inap long taim papa bilong em i bin makim. ³ Na wankain olsem, yumi bin i stap olsem liklik pikinini na yumi kalabus i stap aninit long lo i bosim dispela graun. ⁴ Tasol, long taim God i bin makim, God i salim Pikinini Man bilong Em i kam. Wanpela meri i karim Em, na Em i bon aninit long lo. ⁵ God i salim Em i kam bilong baim bek manmeri i stap aninit long lo, bai God i ken adoptim mipela na mekim mipela i stap pikinini man i kamap bikpela pinis. ⁶ Nau yupela i stap bikpela pikinini bilong God, na long dispela as God i salim Spirit bilong Pikinini Man bilong Em i kam na i stap insait long laik bilong yupela, na dispela Spirit i save tokaut, "Aba, Papa." ⁷ Olsem na, yu no i stap moa olsem yu wanpela wokboi nating. Nogat. Nau yu i stap bikpela pikinini man bilong God. God tasol i mekim yu kamap olsem na long dispela as olgeta samting bilong Papa em bilong yu.

Pol i sori tumas long ol Galesia.

⁸ Bipo, taim yupela no save long God, yupela i stap wokboi nating bilong ol god i no god tru. ⁹ Tasol nau yupela i kisim save long God. Ating mobeta mi tok, God i save long yupela. Em olsem na, long wanem as yupela i tanim i go bek gen long lo i bosim dispela graun, ol lo i no gat strong na i no gat kaikai bilong em i stap, a? Ating yupela i laik kalabus gen long dispela

samting, a? ¹⁰ Yupela save lukautim ol spesol de na ol spesol mun na ol spesol taim na ol spesol yia. ¹¹ Mi sori tumas long yupela. I luk olsem mi bin westim taim bilong mi long mekim wok namel long yupela.

¹² Plis ol brata, plis mi laik yupela i kamap olsem mi, long wanem mi bin kamap olsem yupela. Yupela no bin wokim wanpela rong long mi. ¹³ Yupela save pinis, mi bin kisim sik na long dispela as mi bin kam long yupela na mi autim gutnius long yupela fes taim. ¹⁴ Sik bilong mi i bin givim hatwok long yupela, tasol yupela no tok baksait long mi na daunim mi. Nogat. Yupela i bin welkamim mi olsem mi wanpela ensel bilong God na olsem mi Krai Jisas yet. ¹⁵ Na dispela amamas bilong yupela nau em i stap we? Tru tumas, long dispela taim, yupela i gat bikpela amamas long mi, na sapos yupela inap, yupela inap kamautim ai bilong yupela bilong givim mi bilong oraitim mi. ¹⁶ Tasol nau yupela i tingim olsem mi birua bilong yupela bikos mi autim trupela gutnius long yupela.

¹⁷ Ol dispela man i strong long pulim yupela, ol i no gat gutpela tingting bilong mekim gutpela long yupela. Nogat. Ol i laik birua i kamap namel long yupela na mipela, bai yupela i strong long bihainim ol tasol. ¹⁸ Ol i strong long pulim yupela, na dispela pasin em i gutpela sapos ol i gat gutpela tingting na ol i pulim yupela i go long gutpela samting na ol i mekim olsem olgeta taim maski mi stap wantaim yupela o nogat. ¹⁹ Ol liklik pikinini bilong mi, mi kisim pen gen long yupela, olsem mama i kisim pen taim em i laik karim pikinini. Bai mi karim dispela pen i go inap long taim we trupela wei bilong Krai i kamap pinis long laip bilong yupela. ²⁰ Bikpela laik bilong mi i olsem, mi laik i stap wantaim yupela nau na toktok isi wantaim yupela, long wanem mi paul long pasin bilong yupela.

Hagar na Sara i olsem wanpela tok bokis.

²¹ Yupela ol man i laik i stap aninit long lo, yupela tokim mi, yupela save long toktok lo i mekim o nogat? ²² Buk bilong God i mekim tok olsem, Abraham i gat 2-pela pikinini man. Slevmeri bilong em i karim wanpela, na frimeri bilong em i karim wanpela. ²³ Pikinini bilong slevmeri, em i bin kamap long wei olgeta pikinini i save kamap. Tasol pikinini bilong frimeri, God i bin mekim promis na em i kamap.

²⁴ Yumi ken i yusim dispela stori olsem wanpela tok bokis. Dispela tupela meri i makim tupela kontrak. Hagar i makim kontrak bilong maunten Sainai, na ol pikinini em i karim ol i stap slev olsem Hagar. ²⁵ Hagar i makim maunten Sainai bilong kantri Arebia, na dispela i olsem Jerusalem bilong nau bikos Jerusalem bilong nau wantaim ol pikinini bilong em i stap olsem ol slev. ²⁶ Tasol Jerusalem bilong antap em i fri, na em i olsem mama bilong mipela. ²⁷ Long wanem, buk bilong God i mekim tok olsem,

*Yu meri we bel bilong yu i drai pinis,
na yu i no save karim pikinini,
yu ken i amamas.*

*Yu meri i no bin pilim pen bilong karim pikinini,
mekim singaut bilong amamas.*

Long wanem, bai yu i gat planti pikinini moa long meri i gat man.

(Aisaia 54:1)

²⁸ Na yupela, ol brata, yupela wankain olsem Aisak na yupela i stap pikinini bilong promis. ²⁹ Long taim bilong Aisak, pikinini man i kamap long wei olgeta pikinini i save kamap em i bin mekim nogut long pikinini man i bin kamap long strong bilong Holi Spirit. Na dispela kain pasin i stap yet. ³⁰ Tasol buk bilong God i tok wanem? Em i tok, "*Rausim slevmeri wantaim pikinini*

man bilong em. Long wanem, pikinini man bilong slevmeri i no inap tru long serim olgeta gutpela samting wantaim pikinini bilong frimeri." (Jenesis 21:10) ³¹ Em olsem na, ol brata, mipela no pikinini bilong slevmeri. Nogat. Mipela pikinini bilong frimeri tasol.

Krais i bin friim yumi.

5 ¹ Krais i friim yumi bai yumi ken i stap fri. Olsem na, yupela mas sanap strong na yupela no ken i larim ol man i mekim yupela i kamap slev gen.

² Harim gut tok bilong mi. Mi Pol mi tokim yupela olsem, sapos yupela larim ol man i katim skin bilong yupela, orait wok bilong Krais i no inap helpim yupela liklik. ³ Mi toksave gen long yupela, sapos yupela katim skin bilong yupela, orait yupela i mas bihainim olgeta lo wantaim. ⁴ Sapos yupela i laik bihainim lo na long dispela pasin yupela i laik God i kolim yupela stretpela man, orait yupela i lusim Krais pinis. Yupela i lusim pinis grasia bilong God. ⁵ Tasol God i givim stretpela pasin long mipela i bilip, na long strong bilong Holi Spirit mipela i wetim ol gutpela samting dispela stretpela pasin bai kamapim. ⁶ Long Krais Jisas pasin bilong katim skin na pasin bilong larim skin em i samting nating. Tasol bilip em i samting tru, na dispela bilip i save kirapim pasin bilong lavim ol narapela manmeri.

⁷ Pastaim yupela i ran gut. Tasol husat i distebim yupela na stopim yupela long bihainim trupela tok? ⁸ Em i grisim yupela, tasol dispela toktok bilong em, em i no tok bilong God i singautim yupela. ⁹ Tingim. "Liklik yis tasol i save mekim olgeta bret i solap." ¹⁰ Mi trastim strong bilong BIKPELA na mi tingim olsem yupela bai harim tok bilong mi. Na dispela man i paulim yupela, maski em i husat, em bai kisim pe nogut bilong pasin bilong em. ¹¹ Ol brata, sapos i tru mi wok yet long autim tok bilong katim skin, orait long wanem as mi save kisim hevi long han bilong ol

Juda? Sapos mi autim tok bilong katim skin, orait tok bilong diwai kros i no inap mekim ol bel nogut. ¹² Ol dispela man i skrapim tingting bilong yupela, ating mobeta ol i gohet na katim na rausim skin wantaim olgeta wanemya bilong ol.

¹³ Ol brata bilong mi, God i singautim yupela bilong yupela ken i stap fri. Tasol, dispela i no minim olsem yupela fri long mekim pasin nogut bilong olupela bel. Nogat. Mobeta yupela i lavim ol narapela na yupela helpim ol olsem yupela wokboi nating bilong ol. ¹⁴ Olgeta toktok bilong lo i pas insait long dispela wanpela tok, "*Yu mas lavim ol narapela manmeri olsem yu lavim yu yet.*" (Wok Pris:19:18) ¹⁵ Sapos yupela i kros kros na pait nabaut namel long yupela yet, orait yupela lukaut, nogut yupela i pundaunim yupela yet.

Wokabaut long stia bilong Holi Spirit.

¹⁶ Tok bilong mi i olsem, yupela mas wokabaut long stia bilong Holi Spirit. Sapos yupela i mekim olsem, orait bel bilong yupela i no inap kirap long bihainim pasin nogut bilong olupela bel. ¹⁷ Long wanem, olupela bel i laik bihainim pasin Holi Spirit i no laik bihainim, na Holi Spirit i laik bihainim pasin olupela bel i no laik bihainim. Tupela rot i no wankain, na sapos yu wokabaut long wanpela, orait yu no inap mekim pasin bilong narapela. ¹⁸ Tasol sapos yu bihainim stia bilong Holi Spirit, em nau yu no aninit long lo.

¹⁹ Pasin bilong olupela bel em i ples klia: ol kainkain pasin pamuk na pasin i doti na pasin bilong pilai wantaim ol man o meri; ²⁰ na pasin we ol i lotu long ol aidol na ol kainkain posin pasin; na pasin bilong hetim narapela manmeri, na pasin bilong kros pait, na pasin we ol i jelas long ol narapela manmeri, na pasin bilong belhat, na selfis pasin, na pasin bilong bel nogut, na pasin bilong pas tasol long ol wantok, ²¹ na pasin we ol i jelas

long ol samting bilong narapela manmeri; na pasin bilong spak nabaut, na pasin disko; na ol kainkain pasin olsem. Bipo mi bin givim woning long yupela na mi tok gen, husat manmeri i wokabaut long ol dispela kain pasin ol i no inap tru long lukim ol gutpela samting bilong kingdom bilong God.

²² Tasol kaikai Holi Spirit i save kamapim i olsem: pasin bilong lavim tru ol narapela manmeri, na pasin bilong amamas tru long wok bilong Krai, na pasin we pis i holim tingting na wokabaut bilong yu, na pasin bilong bel isi maski wanem samting i distebim yu, na pasin bilong wanbel na helpim narapela manmeri, na pasin bilong mekim gutpela pasin long ol narapela manmeri, na pasin we ol manmeri i ken i trastim yu long olgeta samting, ²³ na pasin we yu no apim yu yet, na pasin we yu ken i kontrolim ol laik nogut bilong yu. I no gat wanpela lo i birua long ol dispela kain pasin. ²⁴ Ol manmeri i pas tru long Krai Jisas ol i bin nilim olupela bel wantaim ol laik na tingting nogut bilong olupela bel long diwai kros. ²⁵ Holi Spirit i bin kamapim laip long yumi, orait yumi wokabaut long stia bilong Holi Spirit. ²⁶ Em olsem na yumi no ken i bikhet, na yumi no ken i larim pasin bilong skrapim bel na jelas pasin i kamap namel long yumi.

Yupela karim hevi bilong ol narapela.

6 ¹ Ol brata, sapos yupela save olsem wanpela bilong yupela i bin mekim sin, orait yupela i bihainim gut stia bilong Holi Spirit yupela ken i daunim yupela yet na stretim em. Tasol yupela mas lukaut, nogut yupela tu i pundaun long sin. ² Yupela mas karim hevi bilong ol narapela namel long yupela yet, na long dispela pasin yupela bai fulfilim lo bilong Krai. ³ Sapos wanpela man i tingim em i bikpela man tumas, na em i man nating, orait em i giamanim em yet. ⁴ Ol wan wan manmeri i mas skelim pasin bilong em yet. Long dispela wei em i ken i ai klia long pasin

em yet i mekim, maski long tingim pasin bilong ol narapela manmeri. ⁵ Long wanem, ol wan wan manmeri bai i karim hevi bilong pasin bilong em yet.

⁶ Man o meri i kisim skul long tok bilong God em i mas serim olgeta gutpela samting bilong em long man i skulim em.

⁷ Harim gut. Yupela no ken i giamanim bel bilong yupela yet; wanpela man i no inap trikim God. Wanem samting yu plenim long gaden, em i kaikai bilong dispela samting tasol bai i kamap. ⁸ Olsem na, man i bihainim ol samting olupela bel bilong em i laikim, orait em bai kisim samting olupela bel i save kamapim; em bai kisim bagarap. Na man i bihainim ol samting Holi Spirit i laikim, orait em bai kisim samting Holi Spirit i save kamapim; em bai kisim laip i stap oltaim oltaim. ⁹ Em olsem na yumi no ken i les long mekim pasin i gutpela. Sapos yumi no givap, orait long taim bilong kisim kaikai, bai yumi kisim gutpela kaikai stret. ¹⁰ Olsem na, sapos sanis i kamap long yu, orait yu mekim pasin i gutpela long ol narapela manmeri. Tasol, nambawan samting, yu mekim pasin i gutpela long ol manmeri i stap long hauslain bilong bilip.

Las toktok bilong Pol.

¹¹ Lukim ol dispela bikpela rait mi raitim long yupela long han bilong mi yet.

¹² Ol lain i laik lukautim nem bilong ol yet, em ol dispela lain i strong long fosim yupela long katim skin. Ol i mekim olsem bikos ol i pret tumas long karim hevi bilong diwai kros bilong Krai. ¹³ Ol dispela lain i katim skin pinis, ol yet i no save bihainim olgeta lo, tasol ol i laik yupela katim skin bai ol i ken i apim ol yet long dispela samting ol i laik mekim long yupela.

¹⁴ Mi no ken i litimapim nem bilong ol narapela samting. Nogat. Bai mi litimapim nem bilong diwai kros bilong Jisas Krai tasol.

Long diwai kros bilong Jisas Krai olgeta samting bilong dispela graun i pinis long mi, na mi yet mi pinis long olgeta samting bilong dispela graun. ¹⁵ Nau pasin bilong katim skin na pasin bilong larim skin em i samting nating. Bikpela samting i olsem: yumi kamap nupela manmeri. ¹⁶ Na ol manmeri i wokabaut long dispela lo, pis na marimari bai i stap wantaim ol, na wantaim ol lain Israel bilong God i wokabaut olsem.

¹⁷ Mi no laik wanpela man i givim trabel moa long mi. Long wanem, long bodi bilong mi i gat ol planti makmak pinis bilong soim olsem mi bilong Jisas.

¹⁸ Grasia bilong BIKPELA Jisas Krai i ken i stap wantaim spirit bilong yupela ol brata. Tru tumas.